

योनाना पुस्तक

१-२ येकदाव आमीतयना पोरया योनानी संगं परमेस्वर देव गोस्ट करना. तो तेला सांगना, तु ऊठीसनं नीनवे नावना मोठा शेहेरमं जा. तई जाईसनं लोकसला वाईट कामं बंद कराला सांग. तई लोकं जे जे वाईट कामं करत ते आखं माला मायती पडना. ३ पन योना ऊठना आनं परमेस्वर देवपईन पळी गया. तो याफो नावना जागामं नींगी गया. तई तर्सीस जावानी करता तेला येक जाहाज भेटना. मंग योना जाहाजना भाडा दीसनं तई बसी गया. कजं का देवपईन दुर नींगी जावानी तेनी ईशा वतील. ४ पन देव तो समुद्रमं पक्का वारा सोडना. तवं तई येक मोठा वावधन वयना आनं जाहाज बुडाला लागना. ५ मंग जाहाज चालाडनारं पक्का भीवाय गयत. आनं आखं लोकं तेसनं सोतानं देवसला प्राथना करु लागनत. आनं जाहाजना वजन कमी करानी करता तेमतला सामान बाहेर समुद्रमं फेकी दीनत. तवं योना जाहाजना खालना तालमं नीजेल वताल. ६ मंग येक जाहाज चालाडनार तेला नीजेल दखीसनं सांगना, तु कजं नीजी रयना सय. ऊठीसनं तुना देवला प्राथना कर. कदाचीत तुना देव प्राथना आयकी आनं आपुनला वाचाडी.

७ मंग ते लोकं येकमेकाला सांगनत, चाला, आपुन चीठ्या टाकुत. तवं आपुनला मायती पडी का कजं हाऊ संकट आपुनवर वना सय. मंग ते चीठ्या टाकनत. आनं तेसला मायती पडना का योनाघाई हाऊ संकट तेसवर वना सय. ८ मंग ते तेला वीचारनत, तुघाई हाई मोठा संकट आपुनवर वना सय. तु कोन सय आनं आठी काय करी रयना सय. तु कथाईन वना सय. तु कोनता देशना आनं जातना सय. ९ मंग योना तेसला सांगना, मी येक यहूदी सय आनं मी सोरगना देव परमेस्वरला मानय. तो देव जग आनं समुद्र

देव परमेस्वरला मानय. तो देव जग आनं समुद्र बनाडना सय. मी तेपईन पळी रयना सय. १० हाई आयकीसनं ते लोकं आजुन पक्का भीवाय गयत. ते तेला सांगनत, तु काय करना सय हाई तुला समजय का.

११ तवं वारा आनं समुद्रना लाटा पक्का भयानक वई रयनाल. तेमन ते लोकं योनाला सांगनत, आमं तुला काय करुत तं हाई समुद्र शांतं वई. १२ तो सांगना, माला धरीसनं समुद्रमं फेकी घ्या, तवं हाई शांतं वई जाई. कजं का माला मायती सय का मनाघाई हाई मोठा वावधन तुमवर वना सय. १३ पन तेला फेकानी तेसनी ईशा ना वतील. तेमन ते जाहाजला काटमं ली जावाना पक्का कोशीत करनत. पन ते करु शकनत ना. कजं का वारा आनं लाटा पक्का जोरमं वतलत आनं वावधन पक्का वाढी रयनाल. १४ मंग ते पक्का आराळ्या दीसनं सांगनत, हे परमेस्वर देव, येक मानुसनी करता आमं आखं नोको मराला पायजे. हाऊ मानुसना मरनना दोस आमवर लावु नोको. आमला मायती सय का तु खरज देव सय. आनं तु काही बी करु शकय. १५ मंग ते योनाला ऊचलीसनं समुद्रमं धेकी दीनत. तवं लगेज तो वावधन थामना. आनं समुद्र पुरा शांतं वई गया. १६ तवं ते लोकं आखु परमेस्वर देवला पक्का भीवाला लागनत. आनं तेनी करता बलीदान करनत आनं शपथ करनत.

१७ मंग योनाला गीळानी करता परमेस्वर देव येक पक्का मोठा मासाला धाडना. आनं योना तीन दीवस आनं तीन राता तो मासाना पोटमं रयना.

१ जवं योना मासाना पोटमं वताल, तवं तो तेना देव परमेस्वरला प्राथना करना. २ तो सांगना, मी मोठा संकटमं वताल आनं देवला प्राथना करना. तवं देव माला मदत करना. हे परमेस्वर, जवं मी मरनना तोंडमं वताल तवं मी जगना खोल मयथीन तुला हाक मारना आनं तु माला आयकना. ३ तु माला समुद्रना खोलमं

माला आयकना. ३ तु माला समुद्रना खोलमं फेकी दीना. तवं मना चारीमेर फक्त पानीज वताल. आनं शक्तीवान लाटा मावरथीन जावु लागनाल. ४ मी वीचार करनाल का, तु माला तुना नजरथीन नास करी दीना सय. आनं मी कधी तुना पवीत्र मंदीरला दखु शकावु ना. ५ पानी माला घेरी लीनाल. आनं मी बुडी रयनाल. मी समुद्रना मजार खोलमं नींगी गयाल. आनं पानी माला ढाकी लीनाल. मना डोकाला समुद्रना शेवाळं ढाकी लीनलत. ६ समुद्रना पक्का खोल भाग जई डोंगर नींगय तई मी रयनाल. मी वीचार करनाल का, मी कायम तईज रयीजासु. पन हे परमेस्वर देव, तु माला

तईज रयीजासु. पन हे परमेस्वर देव, तु माला मरनना तोंड मयथीन परत ली वना. ७ मी आसा सोडी दीनाल आनं तुला याद करना. तवं तु तुना पवीत्र मंदीरमं मना प्राथना आयकना. ८ जे लोकं मुर्ती पुजा करत तेसवर देवना मया भेटय ना. ९ पन मी तुला स्तुतीनी भेट आरपन करसु. मी तुनी पुडं वचन दीना सय. आनं जा काही मी सांगना, ता मी करी दखाडसु. कजं का फक्त परमेस्वर देव तारन करु शकय.

१० मंग परमेस्वर देव तो मोठा मासाला आज्ञा दीसनं सांगना का, तु समुद्रना काटवर जाईसनं योनाला ऊलटी करी दे. तवं तो मासा तशाज करना.